



LIBRUS IN SARDU

IN GIBA, SANTADI E TRATALIAS: PRESENTADAS DE LIBRUS IN LÌNGUA SARDA

A Aintru de is atividadis culturalis de su progetu

Sighendi a atobiai e a contai su Sulcis in custus ùrtimus duus mesis ant sighiu is presentadas de is librus in lìngua sarda in is Bibliotecas de su Sulcis de bàsciu. At cumentzau in su mesi de cabudanni Pàulu Pisu, chi at presentau in Giba s'ùrtima faina cosa sua: **"Imortali e àterus contus"**, una regorta de contixeddus scritus in campidanesu aintru de Domu Ibba chi ospitat in cussu perìodu sa mostra de su Tibet. Is contus arregortus ant totus otentu arreconoscimentus, prèmius o funt arribaus finalistas a concursus literàrius.

In Santadi su 17 de ladàmini invencias Natascia Muscas e Alessandro Garau ant crìstionau de **"Unu pipiu malu e àterus contus"** chi est acanta de fai duus annus de s'imprenta. Su libru insoru puru est una regorta de contus totus alliongius s'unu cun s'àteru, chi ant tentu prèmius de importu in is concursus literàrius de totu sa Sardinia.

Su 30 de mesi de ladàmini in Tratalias est aproliu su fisicu teòricu **Matteo Tuveri** chi at presentau...

sighit a pag 2



MASAINAS

SA FESTA DE NOSTRA SENNORA DE SA SALUDI AT SERRAU S'ISTADI

Comenti bolit sa traditzioni su primu lunis de mesi de ladàmini in Masainas ant afestau a **Nostra Sennora de Saludi**. Sa festa tenit origini antiga: sa primu testimònia scritta est de su 1856 e de insaras at crèsciu meda tanti chi arribant pellegrinus de totu su Sulcis e fintzas de Campidanu. Duncas ocannu puru is Masainesus e totus is devotus ant annoau sa promitèntzia insoru a sa Reina de sa Saludi ponendidda avatu in prucessioni, cun is arrugas e is pratzas chi

fiant prenas a intipu de genti. Funt andaus beni meda fintzas totus is afestamentus civilis, cun su cuncertu de is **Nomadi** chi at fatu su record de presèntzias: difatis fiant assumancus 4000 is personas chi si funt gosadas su spetàculu musicali prenendi pratza de municipiu. Cun sa festa de Masainas est acabada s'istasoni longa de is festas de su Sulcis de Bàsciu chi fiat incumentzada con s'ennida de Maria Munserrada a Tratalias su mesi de maju passau.

NUXIS

At tentu unu bonu resurtau s'eventu chi s'Amministratzioni Comunali de Nuxis at organizau in sa ex miniera de Sa Marchesa su 5 de ladàmini. Cun sa collaboratzioni de su Speleoclub e de su grupu folk locali, infatis ant cuncordau una sfilada chi at postu impari is bistiris de sposa de sa traditzioni sarda cun sa moda arta de su stilista **Giuseppe Crocivera**, chi tenit espositzionis fintzas in Milanu e in New York. Pustis de is saludus de ritu de is organizadoris est incumentzada sa sfilada cun Claudia Serra (presidenti de su Grupu Folk S. Elia) chi at presentau is bistiris de sa traditzioni sarda e Agnese Delogu chi at contau s'elegàntzia de is modernus, fatus de pannus pretziaus e prenus de detàllius interessantis. A ùrtimu at fueddau su stilista etotu chi est abarrau cuntentu meda de s'acullèntzia chi dd'ant fatu e amajau de sa bellesa de su logu. At contau a comentis est nàscia s'esperientzia sua e at invitau a totus, massimamenti is prus giòvunus, a sighiri a crei sèmpiri in is bisus insoru poita ca su talentu e sa passioni no tenint edadi.



SU PROGETU ARTÌSITUCU E SOTZIALI ORME D'OMBRA AT FATU TAPA IN ARRESI

Su 30 de cabudanni sa comunidadi arresina at arriciu sa bìsita de **Rosalba Castelli**, ativista de su progetu **Orme d'ombra** chi est fendi, a sola, su chi si narat *Cammino 100 Torri* (prus de 1200 km).

S'artista piemontesa est fendi passus meda arremonendi totus cussas fèmminas chi ant tentu su camminu insoru truncau. A dònna tapa, in dònna turri acapiat unu **frocu arrùbiu**: unu po dònna fèmmina morta po mori de sa violèntzia. E in dònna bidda si firmat a fueddai cun sa comunidadi locali e duncas in Arresi est prima andata a sa scola mèdia aundi at arrexonau cun is piciocheddus e is professoras e pustis totus impari funt andaus su nuraxi. De chi su sindigu P. L. Dessì at nau a is piciocheddus de no timmi a fueddai candu bint calincuna cosa chi no andat beni e a no furriai sa faci de fronti a calisiat forma de violèntzia, totus impari ant apicau unu frocu in s'intrada de su nuraxi in memòria de Giovanna Chinnici. Pustis Rosalba s'est firmada a contai s'esperientzia sua a unas cantu rapresentantis de is assòtzius localis.

sighit de pag 1

S'universu a bolu, est una faina totu a pitzus de sa fisica e de cummenti funtzionant s' Universu e sa Matèria impari a unus cantu de contixeddus e a illustratzionis de Arianna Steri. In Tratalias sutzessu mannu at otentu gràtzias a sa presèntzia de piciocheddus medas interessaus a sa temàtica e a scoberri a cumenti "girat" su mundu. Gràtzias meda a is autoris chi funt benius a presentai su traballu insoru: a scriri unu libru totu in lingua sarda est faina traballosa de diaderus e tocat a apretzai is chi stùdiant e spaciant tempus e impinniu po amparai e avalorai sa lingua nostra.

SA BARONIA

Su de 5 mesi de ladàmini sa Necròpoli de **Montessu** at ospitau, in ocasioni de sa **Cida de sa Terra** una cunferèntzia a pitzus de sa georacheologia. Ant fueddau sa dotora Barbara de Nicola, vicepresidente de su CeSim, Rita Melis geoarcheòloga e a ùrtimu s'archeòlogu Giacomo Paglietti. De chi sa cunferèntzia est acabada totus impari, ghias, archeòlogus e sa genti chi at ascurtau is relatoris, funt artziaus a sa necròpoli po biri cun prexu e interessu calincuna de is tumbas prus de importu aundi s'agatant simbolus taccheddaus in s'arroca, arrastus de is antigus nostrus chi podeus osservai ancora oi.



In artu: Unu momentu de s'eventu in Nuxis e unu momentu de sa cunferèntzia in Baronia. Asuta: P.L. Dessì e a Rosalba Castelli e G.P Pisu presentendi su libru suu.

TEULADA

Est andendi beni meda su cursu de lingua de segundu livellu de Teulada. Is scientis no perdint una letzioni, ascurtant atentus e studiant cun impegnu e passioni. No bieus s'ora de si ammostai calincuna "produtzioni" originali insoru!



Unu momentu de su cursu de sardu in Giba



REGIONE AUTÒNOMA DE SARDIGNA
REGIONE AUTONOMA DELLA SARDEGNA

